



# SEDUOS ŠV. JUONA NEPOMOKA BAŽNYČĖ

Tėkros žemaitis vėsumet miegšt pasikuolytė. Teep i sedėškee, apen kun rokunda beužvestumi -- vėskas pas anus bus boven: a kars, a kuoks sujudėms, a ižimybė. I ėe jokei dyvaa, nes miestalis sens, stuov septyniū kelaliu sankėrtuo. Idomiau, ka sedėškee užmėršt veina dalyka -- kad tor dvė veikontės katalėku bažnyčės. Tou Žemaitijuo, musėntaas, gal tik Telšee pasikuolytė, vo grectaa i Varnee.

Perveizlejos bažnyčės inventorio, matuos turtinga anuos istuorėjė i sunkos kėls. 1780 metaas Varniūs vyskops Lapucinskis pašvėntėna bažnyčeele kielika su patena. Pu metu LDK lauka etmuona generuola-adjutanta Adamavičės Benedėkta Juona Nepomoka piningaas pabudavuota koplyčė su zakrastėjė. Da pu dvėju metu ana sėinuos praplatinta, paaukštinta, i varpėnė pristatyta. 1789 metu balondė 22-uos bolė puopiežios Pėjos VI "aprūpėna atlaidaas palliousavėmou sielu nu šveistyklas bausmies: per Uždušėnė ėr anuos Oktava i kas savaltė per tris deinas". Tas pats geradaris B. Adamavičė užrašė bažnyčee 1792 m. žemės lopieli. Tumet atsirada i pėrmasis gaspadorios-konėgs altarista U. Bakštevičė. Kaap vėskou apsirūpėna, belėka tik pašvintėntė. Tū 1793 m. gegožės 16 deina atlėka Žemaitėjės vysk. suprag. Bukats Tads. Teep unt kuoju pastatyta su dėdesnees a mažesnees pakėlėmaas ar smokėmaas gyvava. Bet Sidabravičės Klemensa konėgavėma laikotarpi (1838-1863 m.) bova tėkros auksa omžios. Uns nu valdžiuos pripėrka žemės, pabudavuoje numus, kor ikūrė maža semėnarėjelė i lotynu kolbuos kursas 2-3 m." Mokytojova Vadluga, Aleknavičė. Anuo liūb būtė kelė šimtaa mokiniū. Tou meto bažnyčiuo ėr braidydamas pu klebuona peivas nusėramėnėma ėiškuojė Seduo raštinkavės anykštėns A. Baranauskis. Bet kaap uns raša, tas ėlga netroka, nes možėks būdams susidraugava su bajuorė Pranlauskaatė K. Dėl tuo grectaa i Skouda išpravuodėjė.

Baisė nuostolee ėštėka bažnyčė 1886 m., nes per gaisra sublabiejė klėbonėjė i ūkės budinka. Parapijuonee nepalėka sava bažnyčės nelaimie. Nu Šonberga nuperka senus pašta numus klėbonėjee i ūkiu budinkus. Ėš 1912 m. konėga I. Gutauskė surašyta inventoriaus matuos, kokel anel bova: klėbonėjė su dvilėka lungū, katrū septynė su lunginlem, su dom mūrėnees kamėnaas; klietės, daržinie,

arklininks, kūtalė -- pu veino stuogo, katras ėš veinuos posės šiaudinis, vo kėtuos -- skėidinis; medėnė ledaunė; mūra rūsys bulbiem laikytė i sandėlioks pri arklėninka medems. Sens i sens budinks, luopyk neluopės, nebepadė. Teep i su klėbonėjė, ka nusibuoda kyluotė, XX omžiaus IV dešimtmetie surėntė naujė. Bažnyčė stavuoje ėlgiau, tik 1900 m. konėgs Paulukevičė už sava piningus naujee perstatė. Pagal tū pati pasuona 1989 m. anou suremontava klebuons A. Genutis su parapijuonees. Ka seniau ana buvusi kėtuokė, ruoda 1831 m. aprašos. Bažnyčė sujungta su rauduonaa dažyta varpėnė, katra užsibalgė kupuolo i gelžėnio kryžio. Ontros kryžios pritvirtints bažnyčės galė. Bobinčios tomos, be lungū. Einont i varpėnė ėr chuora duris, kaap ėr ėš chuora i ontra aukšta pu buokšta. Iduomos dvėgobs longs leidontėis laiptaas ėš ontra aukšta, katrū per Šv. Juona atlaidus liūb atidarytė, pastatyte ėš centrėnė altuorė Šv. Juona Nepomoka skulptūra i liūb laikytė mėšės. Žmuonės liūb klausytėis sustuojė unt tėlta i aplinkou bažnyčė. Altuoree bova trys. Vėsė maliavuotė unt sėinu. Poikiausis cėntrinis, katras geraa suderints. Nišuo Šv. Juona Nepomoka, (aukšta menėnė lygė drožiejė darba), skulptūra. Ana maliavuota i paauksouta. Vėršou pėnkės sėdabrėnės žvaigždės. Altuorios poušts i unt druobės nutapyto Šv. Untuona Paduviėtė paveikslo. Tabernakulis, irgi druožiejė darba, be spnyuos. Sakykla tik meistra darba.

Paskotėnė tarpkarė metaas bažnyčė daugiau bova mokiniū. Anuo meldies būsėmė poetaa Indriekos, Mačėrnis. Pu kara, 1948 m., uždaryta, paversta sandielio, vo veino muomento daa i malūno. Nebier pundatuorė i anuo žmuonos grabū, katrel bova sklepe.

Stuov bažnyčė unt Varduvoas kranta, kaap ėr prider Šv. Juona Nepomoka pagerbont, primindama senus laikus, kaa šalėp bova valsčiaus raštėnė, grūdū sandėlys, mokykla, dvars. Ėe sukuos vėsos miestalė gyvenėms. Dabaa tik su sava omžininko "magazėno", veins pri kėta besiglausdamė, mėnavuo tus gerus Sedaa laikus.

P. ŠVEREBAS  
SEDA